

 **Convenio de cooperación entre a Consellaría de Industria da Xunta de Galicia e a Universidade de Santiago de Compostela, para a realización do curso de posgrao de dirección e xestión de cooperativas e pequenas e medianas empresas**

 **REÚNENSE:**

Dunha banda, a Sra. Rosalía Lama Valcarce, conselleira de Industria da Xunta de Galicia, en representación desta institución en virtude do Decreto 289/2005, do 23 de xuño, do seu nomeamento; no exercicio das facultades que lle confire o artigo 34 da Lei 1/83, do 22 de febreiro, reguladora da Xunta e do seu presidente.

Da outra, o Sr. Caetano Valverde Baño, reitor da Universidade de Santiago de Compostela, en representación desta institución segundo o establecido na Lei 11/2002, do 25 de agosto, e no Decreto 223/2003, do 18 de xullo, da Xunta de Galicia.

 **e EXPOÑEN:**

Que a Universidade de Santiago de Compostela é unha entidade que leva a cabo actividades de docencia e que traballa a prol do desenvolvemento económico de Galicia.

Que o fomento da economía social, unido á integración do Estado español na Comunidade Económica Europea suscita novas necesidades en áreas do coñecemento e na experiencia práctica do cooperativismo e das pequenas e medianas empresas, polo que se fai preciso adaptalas ás novas necesidades do mercado.

Que a Xunta de Galicia en xeral, e a Consellaría de Industria en particular, apoian as iniciativas que conducen ao mellor coñecemento da problemática do cooperativismo en Galicia, así como á formación de especialistas que faciliten unha maior expansión e capacitación non só das cooperativas, senón tamén das pequenas e medianas empresas.

Que a Universidade de Santiago de Compostela e mais a Consellaría de Industria consideran esencial o establecemento de accións precisas tendentes a un maior desenvolvemento económico da Comunidade Autónoma de Galicia.

polo que acordan subscribir un convenio de colaboración de conformidade coas seguintes

CLÁUSULAS

1 O obxecto deste convenio é establecer as condicións polas que se rexerá a cooperación entre a Consellaría de Industria e mais a Universidade de Santiago de Compostela para realizar un Curso de Posgrao de Dirección e Xestión de Cooperativas e Pequenas e Medianas Empresas.

2 Como contrapartida á contribución que se establece no acordo quinto, estipúlase a participación no curso de persoal adscrito á devandita Consellaría, ata un máximo de cinco persoas.

3 As materias que se desenvolverán no curso son as establecidas no programa, que se inclúe como anexo 1.

4 A Consellaría de Industria subvencionará a realización deste curso.

5 A contribución ao financiamento do curso, no que atinxe á Consellaría de Industria, establécese en 60 000 de euros, con cargo á partida 564.000 do programa 234A dos orzamentos da Comunidade Autónoma do ano 2023; segundo o estado de gastos e ingresos do orzamento do curso, remitido pola Universidade de Santiago de Compostela, que se engade como anexo 2, sen que os incrementos que sufra este supoñan un aumento da contribución da Xunta.

6 A antedita achega librarase mediante pagamentos parciais, a medida que a entidade beneficiaria xustifique os gastos e por conta da liquidación definitiva, ata o 80 % do financiamento achegado pola Consellaría de Industria. O importe restante aboarase unha vez cumprido o establecido na cláusula sétima.

7 A Universidade de Santiago de Compostela, despois de facer todas as actividades derivadas do curso obxecto deste convenio, remitirá unha certificación dos gastos realizados. Para o suposto de que estes fosen menores ca os previstos, a contribución da Xunta de Galicia minorarase porcentualmente. A Consellaría de Industria resérvase o dereito de solicitar toda a documentación que considere precisa en relación coa xustificación do gasto.

8 O asinamento do convenio non supón relación laboral, contractual ou de ningún outro tipo entre os profesionais que vaian desenvolver as actividades e as institucións que o asinan, de tal xeito que a estas non se lles pode esixir responsabilidade ningunha, indirecta nin subsidiaria, polos actos ou feitos acaecidos no desenvolvemento do curso.

9 Son parte integrante do presente convenio os anexos 1 e 2 que se acompañan.

10 Correspóndelle á Consellaría de Industria posuír a prerrogativa de interpretar este convenio e resolver as dúbidas que xurdan sobre o seu cumprimento, de xeito que os acordos que adopte terán carácter executivo. As cuestións litixiosas xurdidas sobre a interpretación, modificación, resolución e efectos do documento serán resolvidas por ela, poñendo os seus acordos fin á vía administrativa. Contra eles pode interpoñerse recurso contencioso-administrativo, de acordo co disposto na Lei reguladora desta xurisdición. Para este efecto o tribunal competente será o Tribunal Superior de Xustiza de Galicia.

En sinal de conformidade, as dúas partes asinan este convenio no lugar e na data que se indica máis abaixo.

Santiago de Compostela, 12 de novembro de 2024



A conselleira de Industria

O reitor da Universidade
de Santiago de Compostela

ANEXOS

Programa do Curso de Posgrao de Dirección e Xestión de Cooperativas e Pequenas e Medianas Empresas

Orzamento do Curso de Posgrao de Dirección e Xestión de Cooperativas e Pequenas e Medianas Empresas